

*Regio & unde
dicta.
Sima.*

Soli fertilitas.

*Animalium va-
rietas.*

*Imperium majo-
rum.*

Urbes.

Flumina.

Montes.

Vulgi more.

EPIRVS, Græciæ Regio Ptol. & ceteris. *Chaoniam* olim dictam, scribit Martianus Capella: *Oriciam* & *Dodonam* ex Dionysio & Thrasibulo Grabelius. Hodie *Albaniam* vocari, scribunt Leander & Erythreus, *Larta* Richerins & Aeneas Silvius: *Jannam* nuncupari Castaldus ait. Terminatur hæc regio ab Ortu Acheloo fl. a Meridie Hadriatico Mari abluitur: ab Occidente Ionio pulsatur Mari usquem ad Celydnū amnem seu Pepylychnum: qua Septentrio est habet Macedoniam. Regio multis in locis nemorosa & sterilis, ad oram vero maritimam satis fertilis. Scribit Plin. Mala Orbiculata, ex figura orbis in rotunditatem circumacti, dicta, in Epiro primum provenisse, atque inde Græcis *Epirotica* vocata. Animalia producit magna excepto Asino, imprimis. Boves & Canes magnitudine egregia, atque etiam Oves. Equos generosos Epiri commendat Virg. i Georg.

India mittit Ebur, molles sua thura Sabai.

At Chalybes nudi ferrum virosque pontus

Castorea, Eliadum palmas Epiros equarum.

Hanc regionem auctore Trogo *Molossi* primum tenuerunt. Troianis vero temporibus rexit *Ulysses*. Post quem ad *Æacidas* res pervenit, sub quibus longe propagatum Imperium. Deinde locus is ad *Romanos* postremo ad *Constantinopolitanos* pervenit Imp. & eorum concessione ad *Despotos*, familiam quandam magni Epiri. Sed hanc Turca *Amurathes* expulsis Christianis Principibus ante xl annos sibi subjugavit. Urbes hic sunt *Dodone* oraculo Iovis Dodonæi celebris. *Nicopolis*, ab Augusto in memoriam victoriæ, cum navali prælio superavit Marcum Antonium & Cleopatram Reginam, condita. Civitas olim fuit egregia & Incolis frequentissima: nunc *Prevesa* dicitur. *Ambracia*, nunc *Larta* a fl. cognomine. Fuit hæc Pyrrhi Epirotici regia, patria Cleombroti Ambraciota, qui referente Cicerone, lecto Platonis libro de animæ immortalitate, pertæsus miseriarum vite, è loco edito se præcipitem dedit. *Actum*, quam etiam Acarnaniæ clarissimam urbem ponit Gerbelius. Hæc Augusti fuit Colonia, nunc *Capo Figulo* in recentibus tabulis. *Buthrotum* Str. & Virg. *Coloniam* vocat Plin. *Burrino* hodie Sophians. Et *Leucas* ubi Apollinis delubrum & saltus, quo crediti sunt amatores ab amoris æstu liberari, & ex quo prima omnium auctore Strabone, Sappho Poëtria desiliisse fertur, ut Ovidius etiam in epistola Sapphus meminit. Amnes Epiri sunt *Acheron* Ptol. *Aeheros* Livio. *Achelous* Str. Sophiano *Aspri*, Nigro *Catochi*, Kyriaco Anconitano, *Geromlea*. Montes, *Ceraunii* seu *Acroceraunii* altitudine famosi, nautis formidabiles. Nam quotiescumque nubecula inde elevantur, tempestates in eis maximæ exoriuntur. *Stymphe*, ex quo *Arachnis* fl. proficit, teste Str. Incolæ, Bellonio referente, turmatim sua regione ætate egrediuntur, ob soli sterilitatē, atque alio proficiscuntur, nempe in Macedoniam, Romaniam, & Natoliam, ubi operam Turcis locant lucri gratia, veluti ad segetes metendas, & Frumentum expurgandum: qui postea messe perfecta domum Autumni tempore redeunt cum uxoribus & liberis vetam traducturi. Sunt autem Christiani, & peculiarem habent linguam a Græca diversam: religionē tamen Græcam colunt, & quoniam Græciæ vicini sunt. Græcū etiam Idioma callent.

Restat